

摛藻堂四庫全書薈要

集部

欽定四庫全書

晉書卷一百三十七

集部

毘陵集卷十

唐 獨孤及 撰

靈表 一首

唐故朝散大夫潁川郡長史贈祕書監河南獨

孤公靈表

墓誌上 七首

唐故潁川郡長史贈祕書監獨孤公第三子澄

墓誌

唐故浙江東道節度掌書記越州刻縣主簿獨孤丕墓誌

唐故潁川郡長史贈祕書監獨孤公第六子萬
墓誌

唐故亳州刺史鄭公故夫人河南獨孤氏墓版
文

前左驍衛兵曹參軍河南獨孤公故夫人京兆

韋氏墓誌

殇子韋八墓誌

唐故大理寺少卿兼侍御史河南獨孤府君墓
誌銘并序

靈表

唐故朝散大夫潁川郡長史贈祕書監河南獨
孤公靈表

公諱某其先劉氏出自漢世祖光武皇帝之裔世祖生

沛獻王輔輔生釐王定定生節王丐丐生長子廣嗣王位次子廩仕漢為洛陽令廩生穆穆生進伯為度遠將軍擊匈奴兵少援不至戰敗為單于所獲遷居獨孤山下生尸利單于加以谷蠡王之位號獨孤部尸利生烏和和生二子長曰去卑為右賢王建安中獻帝自長安東歸有李傕郭汜之亂右賢位率其部衛車駕還洛遂徙遷許復歸國卒次弟猛代立生嗣論富論富論生路孤路孤生眷眷生羅辰從魏文帝遷都洛陽遂為司州

洛陽人始以獨孤其部為氏用征伐賜爵永安公位征
東將軍定州刺史征東生萬齡官至廷尉謚曰貞廷尉
生稽字延平善左右射學窮金匱之奧魏世祖初從平
滑臺以功授散騎常侍歷守冀定相三州時新定律令
慎選廷尉徵公拜焉再世為法官俱以廉平不苛顯名
當時榮之加鎮東將軍薨謚曰文鎮東生歸辯聰而才
又為鎮東薨贈太尉太尉生冀字希顏以博學侍講東
宮歷安南將軍定州刺史贈司徒司徒生永業以文武

兼備佐齊王入洛定鄴都督幽洛二州由行臺尚書令
陞司徒封臨川郡王語在齊史臨川王生子佳在齊為
勁弩將軍在周為儀同三司在隋守清遠鎮握節死難
贈并州刺史生義順武德中歷民部侍郎尚書左丞先
祿大夫封洛南郡公洛南生左千牛備身諱元慶公之
祖也千牛生朝散大夫定州長史諱思陳公之父也二
十三葉之德善鍾其人於公公剛方廉清貞信弘寬德
厚性和與四時氣侔非天下直道不行非先王之法言

未嘗言當出處去就之間非所與不苟求與朋友交非
同道不苟合至守王事臨大節非其正雖臨大兵不懼
恪德危行居易中立不可得而親不可得而疎讀書觀
忠孝大畧不索隱蹟屬詞止乎禮義不止詠情性而已
太極元年詔舉文可以經邦國者宣勞使源乾曜以公
充賦時對策者數百人公與滎陽鄭少微特冠科首起
家拜同州郃陽縣尉歲滿授好畤縣尉開元十四年玄
宗初登封泰山注意二千石令長以煦嫗下民授公益

州溫江令公治縣如治家明不至察威不至猛去煩苛繖綰之政施德信刑禮以訓齊之溫江人飲公之化逋者復疲者悅善者勸不善者知恥益州刺史張敬忠以狀聞詔授監察御史轉殿中侍御史會權臣惡直斥去不附己者貶公廬州長史明年惡直者罷位公稍移武功令未到官病免二十三年除寧州司馬二十八年遷潁州郡長史初公為御史嘗以直忤吏部侍郎李林甫至是林甫當國常欲騁憾於我而五府三署每有高

選羣公皆昌言稱公全才且各以臧文竊位自引由是
免咎然十年再遷位不離郡佐或勸公卑其道可以取
容於世公曰可卑非道也屈伸天也非人也人如予何
天寶元年加朝散大夫二年七月七日寢疾終於位春
秋五十七位不尊壽不遐志不行善不報其直虛語守
道者相弔以為痛是歲八月殯於郡東至德二年歲次
癸酉十月十有四日權遷窆於洛陽龍門山西岡大厯
四年五月十三日詔贈祕書監命卿之位錫於身後嗚

呼哀哉夫人河南洛陽人也薛國長孫覽之玄孫咸陽
縣丞諱頤府君之女左金吾將軍諱子哲府君之妹稟
天元和生知孝慈含德之厚與坤體合執笄助祭四十
餘載人莫見夫人喜怒之容躬歡順承動叶禮經宗族
以睦長幼以序無言無為化成於家公之加命服也夫
人封封丘縣君汜等既孤夫人棄采蘋之度修釋氏教
受正觀法於長老比丘尼上方服勤一年得四念處三
昧視去諸結猶棄涕唾至德二年隨子東征明年歲在

甲戌七月二十四日終於會稽享壽六十有四八月某
日權殯於雷門之南汜巨及正等遭天不弔無情無怙
以世故坎壈不克遷祔者十一年矣欲報顧復天胡有
極今年問宅兆於前都水使者張係係卜甘泉東伊水
西甘泉鄉之原吉謹以歲次己酉秋七月壬午遷公夫
人靈坐合厝於此原猶懼陵谷世人之不明我期也故
不敢不志收血勒石以遺後嗣

墓誌

唐故潁川郡長史贈祕書監獨孤公第三子憕
墓誌

唐天寶元年歲次壬午潁川郡長史府君第三子曰憕
寢疾卒於潁川至德二載冬十月四日權窆於洛陽龍
門西山大歷四年五月十二日詔追贈潁川府君祕書
監是歲七月壬午遷宅兆於壽安甘泉鄉之原以君之
喪葬於塋之左禮也君沉毅果斷聰敏好學弱歲專左
氏春秋工於畫尤善音律圖書之奧靡不深究性倜儻

達節不欲以細行竊名志氣方遠未仕不幸多病年纔
二十二而歿修短之經聖人罕論同塵顏冉茹恨何言
嗚呼

唐故浙江東道節度掌書記越州剡縣主簿獨
孤丕墓誌

皇唐故潁川郡長史贈祕書監河南獨孤公遷宅兆於
壽安縣甘泉鄉之原公第五子丕陪葬於塋之西序第
三兄憕墳在右第六弟萬墳在左三穴齊列如平生侍

立之序禮也不字山甫少聰明有志操好學博古年十五能屬文祖述典謨實而不華有古人風彩至若探宗圖緯推步六甲昊天厯象太一之奧悉究其趣尤好黃老道與脉藏榮衛之數奉之以為衛生之經每餌藥鍊氣謂丹砂可學乾元二年從季父峻為御史中丞都督江東軍事盛選僚佐表為剡縣主簿軍書羽檄悉以諮詢觀其志氣遙遠冲然有騁長途致青雲之勢不幸短命卧疾累旬卒於會稽春秋纔二十三位不過部從事

其弘識明畧真氣妙用藏於身而未形也世無得而稱之矣嗚呼哀哉是歲乾元三年歲在己亥秋九月也臨歿歎曰孝道以冀全真策名期於顯親未中道二志俱棄命也夫是月也殯於雷門之南先夫人壽宮之傍行已十年反葬此宮無兒可以主祭悲孰甚焉故月而日之以備朽壤洒淚紀德哀罔有極

唐故潁川郡長史贈秘書監獨孤公第六子萬

墓誌

萬穎川長史府君第六子性專靜內敏有幹局多才藝
嗜學好古誦老聃莊周之書究其大畧罹於多難未遑
筮仕乾元三年夏六月與昆弟同侍板輿將如吳遇疾
歿於楚州春秋二十九七月殯於廣陵山光南之西大
歷四年五月詔贈穎川府君祕書監是歲七月壬午奉
遷神座令祔於壽安縣甘泉鄉之原先是萬之喪至自
廣陵是日陪葬於瑩西隅禮也夫惟天壽之數雖聖智
所無可奈何今刻石志美冀其名之悠久也

唐故亳州刺史鄭公故夫人河南獨孤氏墓板文

夫人河南洛陽人也其先劉氏出自沛獻王輔其裔孫因山命氏中復劉自獻王十九世至齊行臺尚書令永葉始復為獨孤氏自臨川至潁川郡長史府君六葉明德道炳於世夫人潁川府君長女性聰畧有志尚寬仁慈順加之以明柔而不惑儉必中禮歸鄭氏生二男二女而寡男始孩女未亂鞠而育之導之義方長男曰季

華次曰子華既長皆敦說詩禮被服文行時人稱夫人
善誘善教乾元三年因洛陽再擾隨子北征永泰二年
某月終於鉅鹿郡享年若干嗚呼仁而宜壽慈儉宜福
二者反是為善者惑焉初夫人少因有行思歸寧而不
得晚值多故去邦族而無復由是終身有遠父母兄弟
之痛焉臨終顧謂其子葬我必於先夫人之壠季華等
泣奉遺旨大歷三年歲在戊申以夫人之喪至自鉅鹿
冬十一月庚寅反葬洛陽龍門潁川府君塋兆之側夫

人之志也及敢書伯姊之德銘諸墓石云

前左驍衛兵曹叅軍河南獨孤公故夫人京兆

韋氏墓誌

夫人諱某字某楚王交傳孟裔孫唐許州司馬皎曾孫渭南縣主簿懿之孫兗州金鄉縣尉商伯季女祕書省著作郎京兆從丞相偉睦州刺史儕之妹其先自彭城郡徙京兆從丞相賢後九世至本州大中正穆有東西眷之號二十三世至徵士夐居魏周二代出不降志處

不隨俗時人號為逍遙公夫人之七世祖也逍遙公生
民部尚書建安公世恭建安生上大將軍宋州刺史仁祚
將軍生給事中旅即許州之禰也夫以四言之遺直一
經之餘烈十徵之高風焯於古今宜其秉哲垂懿百代
不墮地之華望之崇與春秋之唐杜范氏漢晉之袁揚
王謝侔其熾大矣哉二十八葉之明德茂祉降衷於夫
人故孝慈貞儉溫惠淑慎文敏好禮三者皆天機生知
不待師訓而至廣德二年夏六月歸於我衣服飲食躬

自菲薄夙夜戒敬致孝於行菜接姊妹以謙馭幼賤以
敬敦善勸義恕不知而矜不能喜怒未嘗見於行止也
其德禮所化宗族以睦兒童知讓生一子四歲而歿大
歷四年夏六月癸丑再孕不育乙卯歿於舒州春秋若
干仁厚而不福德備而不壽是天不惠於我家也向使
錫厥永年正家承筐宜爾子孫百祿是享非夫人曷歸
啟手足之日長幼號咷外姻內姻親疎皆行哭失聲也
宜哉是歲九月甲申以輜綈裳帷遷於洛陽十一月丁

西安宅兆於舅姑先塋之西南隅恐時逝事遷景行不
貽於後故刻石以志卒葬且謹而日之

殤子韋八墓誌

殤子河南獨孤氏小字韋八以其弱而未名也故以字
稱北齊司徒行臺尚書令臨川郡王七代孫左驍衛兵
曹參軍功之元子祕書省著作郎京兆韋儕之甥生有
奇表溫明聰秀覃訏于保姆傳婢之手嶷然異于凡童
氣閒體和取予必時諸父諸姑每謂興我家者必此兒

也賓客之至者看王人不暇倘假以壽命則成器致位
未易度也不幸多病大厯六年歲次辛丑十二月二十
二日歿於舒州壽止五歲四十甲子長幼惋毒六姻悼
惜嗚呼天將不昌吾後裔乎不然曷使此孩不至於成
與大厯八年夏四月十六日以其喪歸葬於洛陽祔於
王父母宅兆之側其仲父銜涕書其始終紀於墓云

唐故大理寺少卿兼侍御史河南獨孤府君墓

誌銘

并序

府君諱嶼河南洛陽人漢世祖光武皇帝第二子沛獻
王輔之昭也齊臨川郡王河陽道行臺僕射洛州刺史
永業府君五代孫國朝明威將軍文惠府君第二子越
州都督浙江東道節度觀察處置使兼御史中丞左金
吾大將軍峻府君之季弟也聰明仁恕專直寬信擾而
毅溫而厲弱冠筮仕以藝即戎藏器安卑非其志也天
寶十四年安祿山反朝廷以淮肥海沂三吳咽喉宜擇
良佐以貳藩鎮命府君為泗州長史無何換滁濠二州

倅戎備叅吏職忠敏肅給所莅累賴御史中丞崔公昭
之尹河南也盛選僚佐表府君為太常丞兼殿中侍御
史營田判官使罷轉湖州別駕大歷五年崔公授詔持
節牧宣歙池三州府君復為從事以太子右諭德兼殿
中侍御史遷大理少卿兼御史謂方宜民宜人祿與壽
俱遭命不淑春秋五十五而歿是歲大歷九年春三月
二十四日夫人隴西李氏以栢舟之誓提携諸孤某等
奉府君之喪言歸洛陽某月日窆於某原禮也府君少

孤事兄嫂以友悌稱在家在邦言信行果居官祇事強
志能力及其冠法冠佐太府上以勤恪周爰成務下以
明誠勞謙應物和禮正家敦睦族姻自疎及親必慈必
愛而命不我與年未下壽天其天掾嗚呼哀哉初府君
之金吾伯兄擁旄浙東也拔崔公於羣吏之中外為軍
司馬推誠委政之分猶晉得韓厥宋得子罕及中丞之
開府辟掾府君為首既而府君之喪也中丞哭之慟贈
賄賄給加於人一等由是稚子孀妻得奉喪而西三月

而葬禮無違者。賻布之餘足備祭器。君子謂金吾之明哲。貽厥兄弟宣州之交情。見於死生知己之道。斯其行者鮮矣。及敢不以直詞書仲父之美於墓石。其辭曰：

叔父懿德承家令儀惠迪哲兄踐修靡違移治於官發迹淮沂及佐皇華赤繡其衣天子命我再叅軍機駱馬驥驥所從其誰顯允君子為諸侯師府君委質咨諏載馳式壯其猷耄未及之陰陽為冠子鵬洽期昔也陟崗哀哀永思今也反真匪公曷依伯兮叔兮今乎已而他

年九原公誰與歸

毘陵集卷十

謹案卷八第五頁前七行犯我疆場原本場訖場

據左傳改

第九頁後一行愛及斃嬖原本嬖訖嬖今改

第十八頁前五行裴朏原本裴訖斐今改

卷九第十四頁前七行將貽惑于來世原本惑訖

據文苑英華改

第十四頁後七行則三碑載之詳矣原本矣訖也

今改

卷十第二頁後七行生嗣論富論原本訛重嗣論
今改

第九頁後一行皆敍說詩禮原本說訛閱據左傳
改

總校官庶吉士

臣侍

校對官檢討

臣盧

謄錄監生

臣徐

松

應

唐故朝散大夫中書舍人祕書少監頓丘李公

墓誌

唐故給事中贈吏部侍郎蕭公墓誌銘

并序

唐故銀青光祿大夫太子左庶子嚴公墓誌銘

并序

唐故尚書庫部郎中滎陽鄭公墓誌銘

并序

唐故吏部郎中贈給事中韋公墓誌銘

并序

唐故河南府法曹叅軍張公墓表

墓誌墓表

唐故正議大夫右散騎常侍贈禮部尚書李公

墓誌銘并序

歲在丁未七月丁卯有唐故右散騎常侍李季卿薨享年五十九文經邦國行滿天下無人非鬼責之悔以近後劇無中人十金之產以補祭於身沒顧謂宗子家老必以布車一乘斂手足形還葬其孤馮翊縣令霸等泣奉遺命以某月庚寅附宅於長安九碑原之先塋名公

上士護喪會葬同道必至哀纏都邑初公烈考曰適神龍中歷官中書舍人昭文館學士工部侍郎才高而明為文章著龜公生而好學地使然也豁然閑達天所縱也臨大節而賈勇不私其身也進賢不進不止事君以忠也當昔天步方艱王師有征公入叅諫臣出佐軍政直躬咨諭戎臣賴之其後領二曹判二州再司王言三載京尹由祕書少監為吏部侍郎復兼御史大夫慰撫山東淮南明年勞旋典選如故大歷三年拜右常侍其

欽定四庫全書叢要

集部

毘陵集卷十一至十三



詳校官助教臣常循

欽定四庫全書叢要卷一萬三千七百二十六

集部

毘陵集卷十一

唐 獨孤及 撰

墓誌墓表中九首

唐故正議大夫右散騎常侍贈禮部尚書李公

墓誌銘

并序

唐故祕書監贈禮部尚書姚公墓誌銘

并序

唐故特進太子少保鄭國李公墓誌銘

并序

唐故朝散大夫中書舍人祕書少監頓丘李公

墓誌

唐故給事中贈吏部侍郎蕭公墓誌銘

并序

唐故銀青光祿大夫太子左庶子嚴公墓誌銘

并序

唐故尚書庫部郎中滎陽鄭公墓誌銘

并序

唐故吏部郎中贈給事中韋公墓誌銘

并序

唐故河南府法曹叅軍張公墓表

墓誌墓表

唐故正議大夫右散騎常侍贈禮部尚書李公

墓誌銘并序

歲在丁未七月丁卯有唐故右散騎常侍李季卿薨享年五十九文經邦國行滿天下無人非鬼責之悔以近後劇無中人十金之產以補祭於身沒顧謂宗子家老必以布車一乘斂手足形還葬其孤馮翊縣令霸等泣奉遺命以某月庚寅附宅於長安九碑原之先塋名公

上士護喪會葬同道必至哀纏都邑初公烈考曰適神龍中歷官中書舍人昭文館學士工部侍郎才高而明為文章著龜公生而好學地使然也豁然閑達天所縱也臨大節而賈勇不私其身也進賢不進不止事君以忠也當昔天步方艱王師有征公入叅諫臣出佐軍政直躬咨諭戎臣賴之其後領二曹判二州再司王言三載京尹由祕書少監為吏部侍郎復兼御史大夫慰撫山東淮南明年勞旋典選如故大歷三年拜右常侍其

勤王家十有餘年舉措由道行止以直居貞守忠慤不能惑思賢求才若渴若饑推心吐誠親疎以之執德之經不為利回正進退於忠信視得喪如洟涕凡君子在位則不仁者遠攸徂之邦宜皆蒙福遽奪公算是不惠於斯人也天難忱斯嗚呼哀哉諸公以為不可奈何者壽夭之數若奮揚景行宜在知已由是尚書右丞長樂賈至作銘曰

於維李公誕靈中和磊落瓊奇如山如河胷中洞開萬

里長波孝友忠信詩之無邪早歲登科以文從吏累擢
大邑拔乎其萃時之方難朝慎名器帝曰忠讜爾居諫
議出典方岳入趨禮闈再掌絲綸翹翔鳳池乃作天官
又侍紫微八使澄清功濟危時諤諤正言有犯無隱恢
詣善謔託諷脣吻雲衢未窮陰霜夙賈悽愴東川古來
共盡人懷遺愛帝念謀猷褒褒贈春官悲感林丘已矣平
生哀哉若浮獨有令名與天悠悠

唐故祕書監贈禮部尚書姚公墓誌銘并序

有唐祕書監永安縣侯姚公諱子彥字伯英其先馮翊
蓮勺人也至高祖僧洪徙家河東祖思聰祕書少監父
坦汝州梁縣丞贈祕書監公忠諒孝愛寬仁愿恭質方
氣冲天所授也而力行博學溫故知新錯綜六藝公作
詞賦初舉進士又舉詞藻皆升甲科尉清苑獲嘉永寧
三縣開元二十九年詔立黃老學親問奧義對策者五
百餘人公與今相國河南元公載及廣平宋少貞等十
人以條奏精辯才冠等列授右拾遺內供奉歷左補闕

於時選多士命百官先文行而後名法而柱下方書南
宮章奏主張綸翰典司禮文尤精其選非盛名莫居繇
是遷公殿中侍御史禮部員外郎禮部郎中知制誥中
書舍人太常少卿天寶十四年奉詔宣慰江東淮南覽
觀風俗無何二京陷覆太夫人捐館公外罹憂患內纏
惄疚銜憤泣血毀隣滅性乘輿反正公適外除拜太子
右庶子於時逆難始康百揆草創官復其職人亦求舊
俄又授公中書舍人禮部侍郎光祿卿左散騎常侍加

銀青光祿大夫復知制誥廣德二年授祕書監以儒行
懿德策名三朝遺跡故事周遍臺閣資忠體和唯道是
居正身奉上中立不倚恐懼戒慎形於隱微故遭值傾
否出入夷險而未嘗有悔名與身偕德善是依明哲以
保故也享壽七十有八大歷三年四月某日薨於位五
月某日詔贈禮部尚書知言者以為壽富康寧道好德
考終命洪範謂之嚮用五福而公居四焉以清儉貽厥
子孫故所不至者富焉爾非明德介祉何以享茲有子

曰驥曰驥曰驥曰駟號於昊天痛欲報之罔極也
銜恤問禮收血裏事十月丁酉卜兆此原惟盛德與公
器若川流之無還垂芳如之何刻銘墓門其辭云

恂恂祕書蘊粹含和服膺孔門行隣四科遭時之康天
下尚文公奮羽翰翹翔慶雲晚逢中興貴德尚齒公秉
懿範入作卿士逮事三后出入二紀典禮司書媚于天
子居貞保儉與祿終始鬱鬱佳城烈烈餘美日月有逝
令問無已

唐故特進太子少保鄭國李公墓誌銘

并序

少保諱遵皇唐太祖景帝七世孫也祖瑜鄭州刺史追贈太常卿烈考曰暉官至太僕贈太子太師揚州都督公聰朗奇偉豪邁曠達率性忠孝臨節有勇開元年初仕天寶六年出守始於淄川歷濟南汝南以剛明莅衆所居政肅民受其賜生為立祠十四年秋九月由執金吾為彭原郡守明年長安覆沒玄宗遜於南京便橋之後我師敗績自新平屬之五原二千

石皆反為賊守肅宗以餘騎十數次於彭原公頓首迎謁且憤且喜因獻衣服鞍馬泣問大計乃悉發倉庫募敢死士獲九百人公自誓衆扈蹕而北翌日師次臨涇又北至於平原收擄貳逆命者斬之以殉破其餘黨進幸靈武旬日衆至數萬王師遂張於時法駕播越神器無主公與裴冕等率羣臣勸進陳天意上尊號上即皇帝位拜公尚書工部侍郎領宗正卿乘輿南旋公封鄭伯舊京始復公典營建社稷宗廟園陵壇壝罔不

畢修百工咸若乾元二年論功行封策為鄭國公定食
實封二百戶加特進工部尚書宗正如故上每拜公相
命將帥建妃后公悉參焉渥澤滂沱黑鴈盈門家有陸
生之橐樂兼魏絳之賜中興宗臣倚寵無二會李輔國
泄省中語且諷公卿舉已為相公不從密陳其姦明年
肅宗崩公由太子少傅貶袁州刺史竟為盜憎且讒勝
故也寶應二年拜鴻臚尋復加太子少保貶永州司馬
大歷二年七月某日薨於永州春秋若干夫人盧氏蘄

春郡長史諭之子以副笄宜室封范陽郡夫人而偕老
憊願先公十二歲而歿大歷三年夏五月庚申合葬於
萬安山北原禮也惟公宣力殷憂之際克扶艱難之業
忘身衛上忠之至者及居職任事知無不為永泰之後
以列侯朝請則放志達生以觀其身再處左官皆非其
罪知公者謂公進因策勲退不附邪善無近名直而忘
懷斯可謂之達矣有四子謂誦諹謗願書其先人之勲
烈使後嗣得酌而觀之於是公母弟祕書少監日勛謂

及忝佐典三禮宜知先王先公之昭穆故命為誌其辭
曰

貞松之姿匪寒不知公之清規見於國危抗憤忠勤發
民濟師戮力扶義天步乃夷奄有崇波遂荒鄭封帝曰
俞往汝作共工澤流於家慶積恩重門羅軒蓋賜有歌
鍾再謫湘源謂當後笑遂遊岱宗天寶不弔寂寞舊館
淒涼江徼塚石泉戶擣其先曜

唐故朝散大夫中書舍人祕書少監頓丘李公

墓誌

公諱誠字玄成魏郡頓丘人也九代祖誕魏太傅陳留
郡王從太傅七葉生左威衛將軍翊威衛生汾州長史
昇長史生濮陽令諒濮陽生公四歲知禮七歲善屬文
十六戶部尚書姚珽以賢良薦比之終貢開元三年舉
進士十年舉茂才十七年舉文學皆射策取甲科由太
平尉為金吾曹監察御史河南司錄美原令膳部員外
郎考功員外郎天寶元年考功郎中知制誥修國史二

年中書舍人五年祕書少監七年十二月終於京師自初仕至終二十七年歷官十享壽五十三動靜由禮文不諂瀆弘毅貞亮直而不肆居官必忠執事必敬未嘗以悔吝改操為權倖屈法由是自御史為河南府司錄持正不阿故也宰美陽周月收案大猾除其根株然後布政及暮而美陽無訟乃有涸泉湧流白雀馴於廷開元中蠻夷來格天下無事搢紳聞達之路唯文章先公以後造文賦皆第一京師人傳寫策藁相示以為式無

何司言載筆乃典祕書公才盛名與職位俱論者謂公
以文學政事取公器如拾芥雖不至公卿其令問令望
足遺後昆夫人孝義縣君宋氏萊州司馬元同之女禮
樂風操家之範也柔明孝慈天之質也清淨厭離修之
惠也能修采蘋之職以正家節李氏之閨門肅九族睦
實夫人是賴乾元元年隨長女從夫於洋州二年正月
二十五日終於某居享年五十七遂權窆焉路難不克
反葬故也有才子二人曰興曰殷悉能荷先大夫之德

興三十為左補闕起居舍人殷舉秀才甲科永泰二年
興請命於上迎夫人喪至自洋州十月二十七日合祔
於澠池先塋夫唯天地能長且久若丘隴陵谷則無不
遷者也故纂其先人之景行勒於石以為志

唐故給事中贈吏部侍郎蕭公墓誌銘

并序

公諱直字正仲梁長沙王懿七代孫有唐御史中丞臨
汝郡守諒之孟子聰秀英達忠敏孝敬志强體和才方
而圓果於從政當斷不惑有妙用明識足以濟衆利物興

朋友然諾見於一貴一賤之際十歲能屬文工書十二
遊上庠十七舉明經上第名冠太學二十餘以書記參
朔方軍事中丞府君之遇讒謫居也公亦播遷漢東移
尉穀熟至德二年乃由廷尉評授監察御史歷河南府戶
曹京兆府司錄參軍其後驟升尚書戶部庫部司勲吏
部四曹郎自殿中進兼侍御史中丞徐州刺史廣德元
年中一歲四遷更七職朝廷難奉使之選謂匪公莫可
故也永泰元年拜太子左庶子大歷三年授給事中前

後居官二十辟書記支使判官副使行軍司馬貳使臣
之車者八出入冠柱後惠文冠者六所從之主則朔方
元帥張懷欽汴州刺史李彥允揚州刺史李成式戶部
尚書李公垣故相國今戶部侍郎第五公琦今相國黃
門侍郎王公縉中書侍郎元公載其人也當乾元上元
中大憝未靜王室之安危惟方面藩鎮是瞻公所佐之
府必以忠力主畫疑謀危事談笑而決刀筆之所加應
機成務談者稱其多才初公居先公夫人之喪外除猶

毀其後母弟立卒公慕不絕哭再慕不懸樂食不肉談者高其孝友人緩急小大之請必儲必副內姻外姻與所知之喪必匍匐而救之贈哈加於人一等談者服其仁愛至是與為庶子給事黃門出入兩宮優游三公間皆得其歡心方謂六卿九伯之位可坐而拾命不我與天孤人望歲在丁酉二月二日終於靜安里正寢春秋四十六談者歎其名與位與才與時四者皆并獨壽不至時輩以為痛三月二十五日詔贈吏部侍郎嗣子策

密嘗羸然銜哀奉喪來歸冬十月甲午卜葬於洛陽龍
門崗先中丞塋之左禮也先其期論譔功烈以墓銘乞
其父友孝也余欲塞其孝思之盛故錄其實不華其文
銘曰

天地氣和靈芝吐葩德善下鍾才子承家為言為行是
構是荷平聲天子謂公濟美忠文駱馬鐵冠俾佐使臣周
爰海隅撫循斯民往踐諸曹亦倅戎車一麾出守言隼
其旗乃推銅樓復登明廬竹花梧葉棲食茲始曷云不

淑今也邇已萬里可到中途而止逝者如斯化往莫留
瑤林瓊樹零落山丘匪石之貞曷紀德休

唐故銀青光祿大夫太子左庶子嚴公墓誌銘

并序

皇唐太子左庶子河內縣子馮翊嚴公諱損之故都督
洮州諸軍事洮州刺史協之孫贈太常少卿方約季子
中書侍郎挺之母弟家之慶天之休鍾於公躬故德備
少仕昌世遇權臣惡直官不登三臺晚值多難安貞不

競故位不過郡守宮尹前後佐兩衛叅四府領二縣典
七州再入石渠三升龍樓凡處任十八享年七十六未
嘗以利苟合違道從欲用之則行見機不俟動靜允廸
勞謙有光廣德二年六月二十五日終於襄陽是歲八
月權窆楚山西原冢子曰式官至江漢少尹不幸道夭
仲子曰士元由殿中侍御史為尚書虞部郎少子曰士
良領祕書著作悉能裕父盡懿文德取公器他日獨立
訓所至也大歷三年歲在戊申五月二十九日返葬洛

陽先塋禮之至者宗人故太常卿向睿狀公往行貽諸
有司謂公外寬內剛廉正篤敬溫而不厲直而不許學
究原本行有枝葉故其適道求友莅職任事覈其實不
居其華初公宰汜水也以莊明慈惠為政汜水人不敢
欺而戶口增倍獄訟衰止御史中丞蕭隱之以狀聞公
是以有著作郎之拜其後歷太原上谷弋陽餘杭丹陽
雖風俗殊異治效如一不曰才乎公在清池會安祿山
與當國者交惡公曰難作矣遂移疾請告姦黨惡之是

以有弋陽之貶貶之明年河北為戎不曰智乎涉艱患
不辱身踐祿位不徇名居義處順動罔違吉不曰貞乎
嗚呼榮問素業與時皆逝可稱也而不可追也今採其
實錄刻石示後蓋欲報罔極者之志云其辭曰

君子之道容民畜衆公宰二邑二邑無訟與國共此惟
二千石公七剖竹七著成績乃師國子司成望苑考藝
校德以弼三善中和其心正直是踐道亞羽翼名掩春
華忠以事君孝施於家粲粲令子鮮侔晨葩若何不弔

盛德既喪奇徽永沫士友孤望千載九原遊者悽愴

唐故尚書庫部郎中榮陽鄭公墓誌銘并序

永泰元年六月四日尚書庫部郎中鄭公卒春秋四十
有九知舊茹痛行路嗟悼謂公口無擇言身無擇行
得乾之貞固損之元吉坎之常德明夷之正志宜荷福
履俾如山阜而秩止於三百石年不及知天命明神豈
予欺乎嗣子正藐然始孩孤窮何怙八月四日葬于先塋
宗人家老於是乎以果行實錄貢於豐石禮也公諱寵

字若驚榮陽開封人也其先建國命氏有鄭世家言之
矣大王父某澧州司馬贈衛州刺史衛州生襄陽令某
襄陽生臨汾令某臨汾生郎中純懿休祉之所叢也貞
亮忠厚仁讓孝敬融明而溫性與道并二十舉明經高
第解褐鄴尉太尉房公之由鄴郡而為右扶風也表公
茂材擢號縣令號土狹而人窳公用教化清之謂任力
不及任人聽訟不及使無訟故以直弘道以信齊政以
禮肅隣以讓息競莅止一歲號入耻格至德二年拜監

察御史徙太原戶曹領平遙令真拜太谷其在晉如在
虢也詔書勞之錫以命服遷華原令拜尚書工部員外
郎而唐人晉人猶歌詠盛德願得公常居其邦莫有由
也太原守上其狀詔遷太原少尹未行轉庫部郎中凡歷
十官宰四縣一持斧而再起草其政先道德而後刑法內
精辯而外若訥戮力事上吐誠率下罔曲物以直已罔
咈百姓以干名聲唯畏清之知善之彰飲其教者忻然
樂康而不知其惠之所由生也與公遊者靡親靡疎悉

飽醇德而莫見其天機之弛張也其學而知者唯濟南
之書淹中之禮田何之易胡母之春秋酌其微言以治
其身身之治移於閨門閨門之治移於官宦之治可移
於國而壽不可踰於域故位量未丰良史無述焉自古
有死彭殤同途獨有其身歿而其名存乎故老之口此
之謂不朽不可以不識其辭曰

剛德干時道家所忌抑抑鄭公直溫柔毅衆人缺缺鄭
公見朴衆人昭昭鄭公若濁布政四邑四邑和樂雷震

風偃物亦允若御史執法郎官草奏鄭公蒞止德音是
茂于以經術潤色王度宗族叙惇鄉黨歸仁孝謹之風
萬石之門兄也弟也天天申申善則無報天地不仁抑
抑鄭公執德之中生不近其名歿不墮其聲于嗟乎鄭
公

唐故吏部郎中贈給事中韋公墓誌銘

并序

郎中諱元魯字頴叔司農少卿德敏之孫衢州刺史魯
縣康公璆之子天寶五載解褐尉邠州新平其後叅佐

使臣者五入御史府者三一居專城六為尚書郎大厯
二年十二月乙酉以吏部郎中終於京師靜恭里之故
宅春秋五十有五啟手足之日朋從僚吏親者踈者匍
匐雨泣奔之如不及惟郎中寬靜博厚孝友貞儉朴而
愿達而好禮氣和於中而博之以文好惡嗜欲發皆中
節以誠待人不務智巧雅尚儉慎臨事則虛己應物與
道弛張性若踈緩赴急則慘怛之仁形於顛沛誦詩三
百不以文自衒在官必聞未嘗近名尤樂閒曠每以

丘壑為已任機事嬰之而未遑也則公之歿也跡負其志壽違其德官屈其量君子以是三者思其人而哀其命公無胤子以兄子某為嗣大歷三年正月癸酉卜窩於舊塋初執事者議三府高選欲以給事黃門侍公既而弗及僉以為恨至是詔贈給事中以褒美之且復其言也嗚呼渭水東注時與之俱音容緬然何嗟及矣公之從父兄曰元甫與公友愛之外有知已之道焉故天倫之戚加於人一等謂及忝仲氏之舊故使為誌云

言罕秉德勇不必仁文行忠信獨鍾於身凡厥正人既
富方穀子叶子極命故不淑結志方遠為郎未老孰與
若木先秋而槁變化誰宰天地何物目不容瞬盛德如
失昨日容徽今如夢焉採君遺塵誌君新阡

唐故河南府法曹叅軍張公墓表

有唐逸士吳郡張從師冲和純粹辯博宏達卓犖好古
儻蕩逸羣言不近名唯代耕是謀貞不絕俗以忘機為
心秀才高第起家臨濮縣尉歷馮翊伊闕二縣主簿乾

元元年拜監察御史中丞鄭昊之擁旄濟江辟為從事
轉河南府法曹叅軍凡歷官五政享年五十有八忘懷
樂道終始以之攘臂於爵祿聲利得喪虧盈之間如浮
雲無心野鶴獨立形全神全身與化俱上元二年八月
辛卯終於吳郡私第其孤惟儉惟靜能稟暮訓弱歲皆
精左氏穀梁春秋藐爾在疚零丁何恃季弟祕書省正
字曰從申迺茹天倫之哀謀及卜筮以是歲九月二十
八日權窆於虎丘山之西原禮也初公祖損之隋大業

中進士甲科位至侍御史尚書水部郎損之生烈考濬
以碩學麗藻名動京師亦舉進士自監察御史為會稽
令文雅之慶施于後昆故擢秀才而衣繡衣者及公三
葉君子以為榮少好黃老且修禪慧晚節持六經微言
以遺三子三子之學不墜於地君子以為博詁諧不羈
頽頹傲世視軒冕纓紱如塵埃必也臨事能斷義形於
色推賢進善不進不止君子以為達當伊川啓戎歷陽
為魚公力窘身陷者至於再涵泳禹沸厲揭橫流而迹

無緇磷憂患不能及君子以為智宜享黃髮而升青雲
天胡降克殲我仁人嗚呼先生往無返期談藪清風詞
林逸韻墨池真草三事永絕凡今友朋可勝痛哉恐後
代丘隴將平川澤相失求遺迹者莫知德音之所始乃
志之以石永為靈表

毘陵集卷十一

欽定四庫全書 舊要卷一萬三千七百二十七

集部

毘陵集卷十二

唐 獨孤及 撰

墓誌下
十一首

唐故右金吾衛將軍河南閻公墓誌銘

并序

唐故范陽郡倉曹叅軍京兆韋公墓誌銘

并序

唐故商州錄事叅軍鄭府君墓誌銘

并序

唐故虢州弘農縣令天水趙府君墓誌

唐故衢州司士叅軍李府君墓誌銘并序

唐太府少卿兼萬州刺史賀若公故夫人河南
郡君元氏墓誌銘并序

唐新平長公主故季女姜氏墓誌銘并序

唐前楚州司馬河南獨孤公故夫人博陵崔氏

墓誌銘并序

唐司直博陵崔公故夫人趙郡李氏墓誌銘并
序

序

唐萬年縣尉崔肅冽故妻李氏墓誌銘并序

唐故天水趙琚墓誌銘并序

墓誌

唐故右金吾衛將軍河南閻公墓誌銘并序

公諱用之遠祖曰文周昭王瑕之昭也生而手有文曰
閻康王奇之命封閻城文四十五代孫滿仕後魏太祖
為諸曹大夫自馬邑家河南其裔孫慶在隋為少司空
慶生毗毗生立本立德唐永徽中立本為中書令立德

為工部尚書立德生玄邃以司空尚書之餘裕也官至澤州刺史邃生巨源嘗宰射洪有仁政射洪人詠歌之公射洪第二子也溫毅邃直廉恪寬信讀論語老子周易被服其教初仕彭州參軍嘗攝督郵一日糾按本州僭謬不法數十事太守徐知人以為材後有詔擇舍人以公魁偉爽晤有醞藉乃登其選會戎侵我天子方愛人息戰將以辭讓屈之詔公使西域以王命喻禍福戎人頓首請罪介馬不汗戈鋌不用而虜軍却遷右衛郎

將知引駕仗金吾將軍李質上殿不解佩刀公呵下殿
陞請按以法左右皆震悚自是環衛加肅先是有司以
三衛執扇登殿引蹕公奏曰三衛皆驕悍有材力不當
升階陞邇御座請以宦者代上曰可遂為故事天寶二
年冊拜公長女為皇子義王玼妃加公左驍衛將軍遷
崇王傳初玄宗憲諸侯王之國任事率多驕蹇不奉法
度而人受其害故開元之後皇子皇孫雖荷封建之命
未嘗離阿保之手悉無出宮闈任卿大夫者公以為王

居深宮則傳相職廢上疏陳古義謁請諸王申輔導之禮議雖廢格上以為忠公已白首位為將軍諸侯傳太夫人尚無恙以銀印赤轂侍朝夕膳色難無違時人榮之太夫人捐館舍禮五十不毀公泣血死孝既免喪天子復因以端士俾傳壽王加朝散大夫上幸溫泉經時未還宮京師人望屬車咸懷怨思公獻四言詩十二章諷諫優詔褒歎後遷左金吾將軍天寶十五載二京覆沒公為虜所獲明年戎師奔然後以初服秋歸至德後

二年十二月終於京師春秋五十九夫人雍州司倉參
軍博陵崔春言之女專靜冲懿慈惠而明用德禮以佐
君子有古風烈亦天鍾其仁不遠其美年若干月日歿
於私第歿六載而公薨俱權窆少陵原有四子寧宋宰
宣以家之不造世故之無寧歲也銜恤茹血不克喪事
者九載廣德中宋以監察御史領高陵令明年辭職始
卜墓於故原吉地乃歲在丙午十一月日遷兆合祔馬鳴
呼惟音形事業悉如化往獨陳迹與丘墓存焉非金石

則無以示久遠故表而銘之孝子之志也其辭云

郁郁金吾洵美且溫事君之忠資於愛親以德資身其
祉宜繁彼美輔佐儀刑閨門禮樂是悅孝慈是敦百歲
之後合德九原獨以令軌垂諸後昆

唐故范陽郡倉曹叅軍京兆韋公墓誌銘并序

永泰二年五月七日有唐故衢州刺史魯縣子京兆韋
璆第三子范陽郡倉曹參軍諱元誠墓於少陵原先塋
夫人范陽盧氏祔焉從周禮也公少時為坊州叅軍歷

襄州司法試守棗陽縣令真授蒙城令凡五遷至范陽
倉曹初安祿山以范陽叛刦脅元元以殺整衆士之因官
因居而困窘顛躡墮圍中者數千計凶威所及不死則
汚公掾吏也在偽署伍中溷迹佯狂冀以病免盜憎之
乃加害焉春秋若干夫陽九厄會天地鞠凶燎火炎炎
玉石何訴是歲天寶十五年也嗚呼人皆筮仕必以廉
平公幹稱於州里人誰無死死則名不辱志不奪不噬
盜哺以易其生生且不苟其事君事親之禮不待史氏

而自明矣在官必聞則居家正身與朋友臨財之節可知矣有子曰彤龍鍾嶠嶧於阻險之中十年不克返葬哀有何極歲在乙巳冬某月始跋涉太行恒山之路以公之喪至自某郡公季弟吏部郎中元曾既得吉卜痛天倫之歡莫之追也願以兄之忠於君恪於官友於家之德之美以播後嗣庶幾陵岸遷而德音不磨謬以及為習於禮者故使為志其辭云

天地橫隕三象霾兮梟獍擇肉鷙鷙懼兮明夷于飛罹

其故兮美玉寧折質不汚兮子子孫孫荷餘裕兮

唐故商州錄事叅軍鄭府君墓誌銘并序

公諱密字慎微滎陽開封人也初韓哀侯滅鄭羣公子奔陳宋間始以國為氏惟桓公武公之德盛故國除而其姓彌大歷漢魏晉迄于今冠冕婚姻世莫與京公其裔也齊中書監南兗州刺史諡曰平諱述祖公之六代祖國朝衛州刺史府君諱某公之大王父也博州刺史府君諱某晉州臨汾令贈太常少卿府君諱某公之

祖禰也公貞方介直勤而愛人初仕趙州栢鄉尉所莅
不過一隅而政行一邑廉使省風俗至趙趙父老率吏
人數千遮道稱公之能識者贊公材且得衆滿歲歸洛
陽家於鳴臯山南趣深險以避安祿山之難親故數百
家携老幼往依之公悉發實窖無親疎皆仰給餓者窘
者得公全活先是累歲力耕致粟至千斛至是而盡談
者稱公之義二京返正天子選賢守相令長將蘇瘡痍
之人殿中侍御史王政以公充賦拜商州洛南令數月

訟平賦均監察御史李椅殿中侍御史王延昌御史中
丞元公載並表言其狀詔書褒稱加公壽王府戶曹參
軍洛南如故無何遷上津令專知轉運水陸漕輓邦都
移用賴公而濟徙大理評事商州刺史盧浦以公前後
課績條奏遂以本官兼商州錄事叅軍御史中丞王延
昌表公才任御史奏未下會疾終於位春秋五十是歲
廣德元年八月七日也其年權寃於商州夫人清河崔
氏某之女生子稚弟幹大厯九年歲次甲寅十一月某

日返塋於洛陽北邙山某原禮也公世業尚文伯仲皆
才公尤深於詩言合麗則究緣情之美天性孝悌檢身
端方居官廉恪其家道足以勸所不至者位止於中士
壽不過知天命命矣夫公母弟尚書刑部郎中宣秘書
省著作郎寶以其兄之德善授牘於及及跪讀三復敢
以實錄刻石其辭曰

緇衣之宜敝予改為蔚彼明德蔭此本枝乃公乃侯典
則是貽藪祉於公實生令儀試吏栢仁嶷然忠規清不

奪節剛不干時以道蒙難處險若夷臨財務施依者如
歸匪愛千鍾仁為吾師亂已運開乃從絜維先禮後刑
以牧熒發商於之人家肥俗移督郵廷評九仞之資曷
云不淑命天功虧明畧未申貽痛所知吉凶匪忱今古
同悲桐鄉之愛懷縣之詩令問顥顥子孫承之

唐故虢州弘農縣令天水趙府君墓誌

府君諱令則字某天水人也其先造父實佐周穆有平
徐偃王之勲因封命氏至晉而大以成季宣孟之慶故

家化為國及武靈而稱王語在太史公趙世家秦滅諸侯使趙王嘉子公輔主西戎戎人懷之子孫因家隴西世為天水著姓其源遠矣曾祖元楷隋殿中監工部尚書淮安公祖崇基國朝岐州郿縣令符璽郎右衛長史烈考慶逸正議大夫許州長史府君長史第二子也好古博學涉獵百家之言善屬文尤注意詩賦外剛毅峭直內溫良而仁率由天性果於行已起家幽州薊縣尉敏洽強濟聞於河朔以直道事人忤幽州刺史張守珪

貶封州開建縣尉遇赦遷建州建安縣丞稍移湖州安
吉縣丞天寶九載選授虢州弘農縣令弘農甸服也地
邇賦殷號為難治府君治之如治家刑以肅淫怠德以
哀鰥寡為政暮年邑民知方三歲績成人無不均不安
乏患虢人頌之解龜後貧無餘貲因遊方河朔會天寶
十五載幽都為戎薦瘥鍾運明夷垂翼至德二載某月
日遇疾終於某州春秋若干嗚呼民莫不穀我獨百罹
才如府君胡不朋三壽綏百祿而生世坎壈歿身喪亂

若之何不弔命矣夫夫人河南獨孤氏朝請大夫汝南
郡長史府君之孫武功縣丞府君之女明哲柔懿實天
生德結帨宜室四十有四載內脩法度輔佐君子躬勤
慈儉以化閨門趙氏之家肥族睦繫夫人是賴有子若
干人訓以義方咸能被服文藝幹父之蠱使有德者必
壽夫人宜登期頤奈何不淑遽奪長筭天寶不信人烏微
福大歷十年五月二日寢疾終於郿縣官舍春秋六十
有七嗚呼哀哉長子湖州安吉縣丞琪琪弟某官瓘蘇

州嘉興縣丞璽太子舍人兼京兆府郿縣令玕晉州臨
汾縣尉珮臨晉縣尉珣珣弟玘是歲秋八月某日奉府君
夫人之喪合祔於京兆某原禮也府君有集若干卷遐
遠之志見於詞矣若言行才業官族歲月非銘無以示
後裔也故著於石

唐故衡州司士叅軍李府君墓誌銘并序

公諱濤皇唐太祖景皇帝六代孫也曾祖道立嘗典
陝濟陳三州刺史封高平郡王祖景淑畢國公父仲

康官至尚書主客郎中楚州刺史世秉懿德為公族領
袖語在皇室譜公純孝忠厚貞信廉讓直而遜明而晦
朴而不固靜而應物克己復禮時然後言策名居官清
畏人知弱歲好學篤志經術專戴氏禮晚節耽太史公
書酌百代之典故以輔儒道以經明行修宗正寺舉第
一初仕許州臨潁縣主簿歷宋州宋城縣尉皆以恭寬
信惠聞於千里議黜陟幽明者謂公文行吏事宜登三
臺會河朔軍興避地江表相國崔渙承詔署衢州司士

參軍於時五府辟召之權移於兵間務苟進者多由逕而致顯位公儉德正志安貞俟時未嘗以得喪夷險帶芥方寸視榮辱晏如也論者高之乾元二年某月日寢疾終於揚州春秋若干某月日權窆於衢州嗚呼仁可以師表搢紳而無貴任禮可以軌範風俗而不遐壽冲用休績卷而未形溢與化往使善人相弔嗚呼哀哉公歿後十有二載從父弟涵以宗室柱石為御史大夫按節江東痛仁兄生不登公侯卿大夫之位歿不備踰月

外姻至之禮遂茹哀筮日減月俸以庇喪具由是大厯
九年夏四月二十七日公長子居介及居佐居敬居易
奉公之輶柩歸葬於洛陽先使君夫人宅兆之側凡今
孝乎惟孝友于兄弟者於此乎觀禮及謂知公者宜莫
若懿親今將以無媿之詞申報幽路故作銘以紀於石
其詞曰

天地方否君子安卑世道既夷隙駒莫追仁而不壽才
既無施積善必慶天何余欺襜襜裳帷沂江絕淮蒼蒼

故山玉樹斯埋死喪之威弟兄孔懷令德家風與天壤
偕

唐太府少卿兼萬州刺史賀若公故夫人河南
郡君元氏墓誌銘并序

夫人諱某魏景穆皇帝九代孫也祖諱某皇朝贈太子少保父諱某克荷前烈不幸早世夫人在孕而孤鞠育於叔父相國潁川公天機聰明生知仁孝被服法度綜習文史年十四嫁河南賀若璿璿積功勞剖符為

郡夫人輔佐以副笄宜室能睦其族且勸以義而風藻
禮範儀刑閨門晚節厭離心垢嚴持禪誦而道機未弘
壽量有極永泰元年三月某日終於渠州享年若干嗚
呼以夫人之柔明孝慈溫惠淑茂况承景穆之餘裕少
保之貽則季父當國良人專城河潤澤及福綏宜遠胡
弗眉壽鍾是短厯潁川公之慟其可既乎大歷二年二
月二十二日反葬於京兆鄠縣之某原宜列景行詔於
彤史恐陵岸或遷音徽將沫故月而日之銘諸堅石蓋

猶父之志也其詞曰

人亦有言天祚明德于嗟邦媛未階壽域家節既成蕙
芳方植仁而無報為善者惑夜臺超忽神斯冥默貞石
有磷德音罔極

唐新平長公主故季女姜氏墓誌銘并序

乙巳歲四月二十六日有唐新平長公主季女姜氏
卒于京師昊天觀五月六日葬于某原長公主歎季
女姿度榮茂溫惠淑慎能循女師之訓動中禮範其

曾祖柔遠位至尚書地官侍郎祖皎以勲舊歷太常祕
書剖符封楚其父慶初能踐修祖考之耿光嗣爵舊國
復居太常玄宗其外王父也肅宗其舅也天池波瀾澤
潤本根謂德鍾下錫祉與壽宜君子家室且貽芳於彤
管乃未笄而天命也夫嗚呼窈窕專柔含德而未形雖
當鵠巢小星乘繫殷雷之德今已矣夫史氏義由記之
矣長公主之慟其庸可及乎故月而日之銘諸堅石其詞
曰

思變季女生于公族稟懿德兮天世其祿不遐其福胡
不淑兮彭殤同躅數不可續哀靡極兮

唐前楚州司馬河南獨孤公故夫人博陵崔氏

墓誌銘并序

夫人諱某博陵安平人也曾祖恭禮國朝駙馬都尉延
齊易州三刺史封博陵郡男祖興宗饒州長史考雋毫
州臨渙縣丞夫人少孤在家以純孝稱既笄莊明而賢
柔順有識年若干歸于獨孤氏奉蘋藻供祭祀事長撫

幼紀合宗族敬恭而誠孝愛備至動必由禮非法度未
嘗踐也生子四人教之以義方夙夜貞厲家道以正婦
如服其義親戚稱其慈天不降喪于我大歷八年十一
月某日享年若干歿于壽州少長行哭六姻涕泗傷夫
人有宜室之美勸義之明而司命奪其長筭使德與壽
反嗚呼哀哉明年十一月日公使長男勣奉夫人之喪
返葬京師某原先塋之側禮也刊石以誌庶德不朽其

銘曰

夫人之德柔明淑慎從夫以禮承筐以順奉若家節率
由彝訓遐福是期溢至何迅謂仁者壽天實不信同塵
彭殤歸根大運于以刊石永播淑問

唐司直博陵崔公故夫人趙郡李氏墓誌銘并

序

夫人諱某趙郡人也皇朝德州將陵縣令鋗之長女天
生柔懿韶齟知禮年十六歸于崔氏丕承宗祀虔恭中
饋謙敬恭儉貞固淑溫閨門化之宗族以睦生一子年

十一而殤有女四人長女夭於襁褓次女適范陽盧履純第三女適河南獨孤及年若干早世少女適樂安蔣鎮皆柔明好禮淑慎有德循度勸義雖造次不違仁實夫人之教訓也輔佐君子三十有九年夙夜靡違家道以正向使神祐正直天報德善宜登期頤與君子偕老嗚呼不造春秋五十四而歿凡所顧復大半道天撤琴瑟之日無兒主祭德與事反哀有何極嗚呼哀哉是歲十月某日卜宅兆于某山某原追紀往行以誌幽石禮

也及忝婚姻之故嘗瞻清懿逝歿相尋報德靡及敢不
備書實錄期于不朽其詞云

莊敬柔順婦行之極抑抑夫人秉是懿德矜磐為戒蘋
藻惟職四始之美六姻是式仁而必報當躋壽域天寶
匪忱古今同感變化忽悅音徽冥默闡右遺範是效是
則

唐萬年縣尉崔肅冽故妻李氏墓誌銘并序

夫人其先隴西人也皇唐高平郡王道立之玄孫畢國

公景淑曾孫祖仲康開元中為尚書主客郎中楚州刺史父濤以貞信篤行為宗室冠冕歷宋城尉衢州司士參軍而歿德重而位不稱啟手足之日為守道者所痛夫人吾之妹子也稟氣於家君之中和母氏之柔明故姿度淑茂恭儉謙順天性孝慈聰慧有識讀書善鼓琴造次必以禮自持莫見其喜怒之容言歸于崔以德宜夫事姑禮節儀刑閨闥輔佐之美六姻是瞻有識者謂當有鵲巢之貴鯀背之壽天則反是使春秋

二十七而終醫不至歟命有極而然歟適來適去皆忽
然歟吾痛且感傷悼之不足故形于文且遂為志其文
曰

爾德爾容天實爾鍾爾志爾年天胡不從勸義孤望
歸安跡絕哀哀母氏泣盡繼血刻字此石紀爾芳烈

唐故天水趙琚墓誌銘并序

琚字遙憐弘農令府君第五子厥生之初會府君先
有封州之役契闊萬里愛而不見故遙以字之太夫

人顧之復之訓視加等及長溫厚孝謹文敏好學美姿儀有材藝戊戌歲十月以櫛綻笄總從府君涉河十一月卒于深州嗚呼未婚未祿天殃是絕不見其成六姻所痛大歷五年八月某日葬于洛陽先府君塋之次禮也其銘曰

彭氏殤子其壽未易歎子之往死生艱躡未如之何刻石以記

毘陵集卷十二